

Un dia farandulero na Aruba 75 aña pasa

Pa: Ramsay Acosta



Gardel na Aruba

AWENDIA debi na nos industria di turismo nos por aprecia aki hopi show di artista internacional cu na hopi parti di mundo of ciudad cu hopi mas habitante cu Aruba no ta yega.

Tin hiaha nos ta puntra nos mes si e fenomeo aki ta semper ta asina of ta algo di ultimo decadan. Un hecho farandulero cu sigur a marca historia y a keda graba den memoria di hopi di nos grandinan ta e bishita di e astro di tango Argentino Carlos Gardel. Tambe algo cu Carlos Gardel a haci pa promer biaha den su bida na Aruba a cambia rumbo di su bida na un manera dramático y kizas di e musica di tango pa semper. Carlos Gardel a nace como yiu

no reconoci y a wordo bautiza cu nomber Charles Romuald Gardes probablemente na Toulouse, Francia na 11 di december 1887. Mester bisa si cu e tawata tin un otro partida di nacemento cu ta indica 1890 na Uruguay, probablemente esun di Uruguay ta falsifica pa asina e evita di wordo yama pa sirbi den ehército Frances durante prome Guerra Mundial. Carlos mes ta bisa semper cu e'la nace na Buenos Aires, Argentina na edad di 2 aña y mei y asina evadi e discusion ey! Gardel su bida artístico a cuminsa na 1910 y te awe ta wordo considera como e creador di musica di tango na 1917 cu e vocalisacion di e cantica Pascual Cuntursi y

Samuel catriota "Mi noche Triste" e disco aki a bende 100.000 exemplar cu pa e epoca ey tawata un éxito tremendo; e tawata un hit den ful Latino America. Na aña 1928 Gardel a bende 70.000 disco den 3 luna na Paris! Tambe Gardel a graba diferente cancion di tango cu a bira inmortal manera "mi Buenos Aires Querido, Cuesta abajo, Amores de estudiante, Volver y El día que me Quieras. Pa evita confucion mester distingui e Volver Tango cu e famoso refran "20 anos no es nada" y e Volver ranchera cu su refran "y volver volver volver

Tambe Carlos Gardel a actua den diferente cine filma na Paris, Hollywood y New York p.e. El día que me quieras y Tango bar. Mester tene cuenta cu den e epoca aki no tawata tin casi telefon, ni internet, ni fax ni television. Audio tawata wordo graba e tempo ey ariba disco di 78, 45 of 33 rpm y esakinan tawata wordo toca riba vitrola (toca disco) tambe disco y vitrola tawata hopi caro no ta tur hende por a compra uno. Radio difucion e tempo ey tawata masha poco, Aruba no tawata tin radio ya cu te 20 anja despues na 1954 Radio Kelkboom a cuminsa su transmision.

E tempo nan aya Aruba tawata scucha radio di Venezuela (desde 1926 tin radio, Radio Caracas), di Corsow, Cuba y Santo Domingo. Mester apunta cu e tempo ey ainda tecnologia di "transistor" no a wordo inventa y e radionan ta traha cu "tube" cu mester keita promer cu e radio por traha.

Propaganda of otro noticia importante tawata wordo haci door di core cu auto cu speaker (bosina) ariba nan den pueblo pa anuncia un ke otro.

Carlos Gardel yega Aruba procedente di Maracaibo cu barco dia 28 di mei 1935 y a haci un recorrido den cayanan di Oranjestad. Un multitud bastande grandi di hende a bay pa salude. Tambe e'la hospeda na un Hotel situa na Wilhelminastraat # 67 cu ta yama "Hotel Palacio" e hotel tawata pertenece na Boy Debrot. Debrot tawata un comerciante grandi e tempo ey. Hotel Palacio tabata keda dilanti di caminda awendia tin e famoso restaurant Argentino "El Gaucho". Pa bai sigui su gira na Corsow Carlos Gardel a dicidi di tuma un avion, esaki a haci cu Carlos Grdel pa promer biaha den su bida a viaha cu avion riba e ruta Aruba-Curacao. Carlos a bai den e Fokker tri-moter "Snip" cu algun luna anterior a habri e ruta aki pa KLM. E motibo cu Carlos no a bula nunca den avion ta pasobra e tawata tin hopi miedo di avion por bisa te hasta panico di bula cu avion. Lamentable su panico tawata su proteccion.

Cu gardel musica popular a drenta Aruba, ya cu anteriormente Aruba su musica tawata wordo domina pa musica folklore clasico manera waltz, mazurca, polka cu a wordo treci dor di e promer habitantenan di continente bieu y despues a sigui nace tumba y tambu di influencia Afro-Indio Caribense. Tango tawata un musica y baile hopi mas sensual cu Aruba tawata conoce pero e la

bira un sensacion. Hopi hende na Aruba a cuminsa canta tango y tambe cana cu e sombre "a medio lado" (di un banda) manera Gardel tambe, te hasta sombre a caba den tur tienda na Aruba e tempo ey. Agrupacionan di joven a lanta, uno hopi popular tawata "Los Trobadores Tropicales" cu integrantenan manera (si mi ta informa bon) Clemente Lacle, Shon Fi Booi, Sjemí Coronel Jan Croes (di SN) y Harold Hopman. Tambe Tali Lopez tawata canta tango mescos Gardel. Gardel a duna su presentacion den Teatro Gloria cu tawata situa den Steenweg. tambe un bar a haya nomber di "Tango Bar" e tawata situa unda awor ta Masifral. Tango a keda popular te fin di anjanan '40 na Aruba. Despues musica ranchera a bira popular

Di Corsow Gardel a bai cu barco Barraquilla pa sigui cu su gira den Colombia, despues e'la bai Bogotá cu avion y di eynan pa sigui su viahe e avion a bay di transito Medellin saliendo di Medellin dia 24 di Juni 1935 e avion "Ford F 31 tri-moter" a slip bai dal den un otro avion riba pista di aterizaje. Gardel a muri carboniza hunto cu un gran parti di su acompañantenan y e leyenda di Tango a nace.

Mi ta gradici Frans Croes (92) cu a dunami algun informacion como un persona cu tawata presente na e show di Gardel 75 aña pasa como hoben di 17 aña. Si mi por a lubida of bruha algun hende of hecho mi disculpa. Importante ta pa nos historia no bai perdi!